

ԿԱՐԾԻՔ

Մանան Պայքարի Աղաբեկյան

**Բազմախոսության հնչյունական-գործաբանական առանձնահատկությունները
(բրիտանական քաղաքական-հասարակական թոք-շոուների հիման վրա)
թեմայով**

Ժ.02.07 «Ռոմանագերմանական լեզուներ» մասնագիտությամբ
բանասիրական գիտությունների թեկնածուի գիտական աստիճանի հայցման
ատենախոսության վերաբերյալ

Ժամանակակից տեղեկատվական հասարակության պայմաններում զանգվածային հաղորդակցության միջոցները կարևոր դեր են կատարում հասարակական կարծիքի ձևավորման, քաղաքական գործընթացների լուսաբանման և հանրային քննարկումների կազմակերպման գործում: Այդ համատեքստում առանձնահատուկ տեղ են զբաղեցնում քաղաքական-հասարակական թոք-շոուները, որոնք հանդես են գալիս որպես հանրային հաղորդակցության ակտիվ հարթակներ՝ միավորելով տարբեր սոցիալական, քաղաքական և մասնագիտական դիրքորոշումներ ներկայացնող մասնակիցների: Նման հաղորդակցական միջավայրում ձևավորվում է բազմախոսություն, որը բնութագրվում է խոսքի հերթափոխի դինամիկությամբ, փոխազդեցության բազմաշերտությամբ և լեզվական տարբեր միջոցների ակտիվ կիրառմամբ:

Բազմախոսական հաղորդակցությունը լեզվաբանական ուսումնասիրությունների համար ներկայացնում է կարևոր հետաքրքրություն, քանի որ այն արտացոլում է խոսքային փոխազդեցության իրական ընթացքը՝ իր հնչյունական, գործաբանական և հաղորդակցական առանձնահատկություններով: Մասնավորապես քաղաքական-հասարակական թոք-շոուներում բազմախոսությունը դրսևորվում է ոչ միայն խոսքի բովանդակային կողմում, այլև հնչերանգային կառուցվածքում, շեշտադրական միջոցների

ընտրության, խոսքի հերթափոխի կազմակերպման և հաղորդակցական ռազմավարությունների կիրառման մեջ:

Այս առումով բազմախոսության հնչյունական և գործաբանական առանձնահատկությունների ուսումնասիրությունը կարևոր նշանակություն ունի ժամանակակից մեդիա խոսույթի կառուցվածքի և գործառության ավելի խորքային ըմբռնման համար:

Հենց այս տեսանկյունից էլ ներկայացված **ատենախոսությունը** արդիական և գիտականորեն հիմնավորված հետազոտություն է, որի **նպատակն** է բացահայտել բազմախոսության հնչյունական-գործաբանական առանձնահատկությունները բրիտանական քաղաքական-հասարակական թոք-շոուների նյութի հիման վրա:

Հետազոտության **արդիականությունը** պայմանավորված է բազմախոսական հաղորդակցության նկատմամբ ժամանակակից լեզվաբանության աճող հետաքրքրությամբ և խմբային խոսքային փոխազդեցության հնչերանգային առանձնահատկությունների ուսումնասիրության անհրաժեշտությամբ: Այն նաև բխում է այն հանգամանքից, որ ի տարբերություն քաղաքական խոսույթի բառային և խոսույթային կողմերի՝ հնչյունագործաբանական և առոգանական առանձնահատկությունները համեմատաբար քիչ են ուսումնասիրվել: Ուստի բազմախոսական խոսույթում կիրառվող հնչերանգային միջոցների ուսումնասիրությունը կարևոր է քաղաքական-հասարակական հաղորդակցության ռազմավարությունների առավել ամբողջական բացահայտման համար:

Ատենախոսության գիտական **նորույթը** պայմանավորված է խմբային հաղորդակցման հնչերանգային առանձնահատկությունների համակարգային նկարագրությամբ: Աշխատանքում հակադրվել են խոսքային գործունեության մենախոսական, երկխոսական և բազմախոսական ձևերը, ներկայացվել է հեռուստատեսային խոսույթի ժանրային դասակարգումը և առանձնացվել են թոք-շոու ժանրի լեզվական ու արտալեզվական հատկանիշները՝ այն դիտարկելով որպես բազմախոսություն: Ուսումնասիրության մեջ ներկայացվել է նաև քաղաքական-վերլուծական խոսույթում համագործակցային և կոնֆլիկտային ռազմավարությունների

հնչերանգային նկարագիրը՝ հիմնված լսողական և էլեկտրաակուստիկ վերլուծությունների համադրության վրա:

Աշխատանքի **նպատակն** է ուսումնասիրել բազմախոսությունը որպես բարդ հաղորդակցական և լեզվամշակութային երևույթ՝ վերհանելով դրա լեզվական և արտալեզվական հատկանիշները, ինչպես նաև առանձնացնել և նկարագրել այն հնչերանգային միջոցները, որոնց գործածությունը քաղաքական-հասարակական թոք-շոուների շրջանակում նպաստում է խոսողի հաղորդակցական ռազմավարությունների և մարտավարությունների իրականացմանը:

Հետազոտության նպատակին հասնելու համար առաջադրվել են մի շարք խնդիրներ, որոնց ճիշտ լուծումները պայմանավորում են հետազոտության տեսական և գործնական արժեքը:

Ատենախոսությունը բաղկացած է ներածությունից, երեք գլխից՝ համապատասխան ենթագլուխներով և ծանոթագրություններով, եզրակացությունից, գրականության ցանկից և ընտրված թոք-շոուների սղագրությունը ներկայացող հավելվածից:

Առաջին գլխում բազմախոսությունը ներկայացվում է որպես խոսքային գործունեության ինքնուրույն ձև՝ դիտարկելով դրա տեսակները, ընդհանուր և տարբերակիչ հատկանիշները: Քննարկվում է բազմախոսություններում մասնակիցների դերային բաշխումը՝ առաջարկելով առավել համապարփակ դասակարգում, որը ներառում է մոդերատորի, առաջնորդի և մեկնաբանի դերերը: Ուսումնասիրվում են նաև բազմախոսական հաղորդակցությանը բնորոշ հասցեագրման ձևերն ու փոխազդեցությունը, ինչպես նաև քաղաքական խոսույթի շրջանակում դրա ազդեցիկ բնույթը: Առանձին ուշադրություն է դարձվում թոք-շոու ժանրին և բազմախոսական հաղորդակցության ռազմավարություններին՝ ներառյալ համագործակցային և կոնֆլիկտային մոտեցումները:

Երկրորդ գլխում անդրադարձ է կատարվում փորձառական-հնչյունական հետազոտության մեթոդաբանությանը: Ատենախոսը ներկայացնում է գործաբանական վերլուծության մոտեցումը՝ դասակարգելով կոնֆլիկտային, համագործակցային և չեզոք ռազմավարություններն ու մարտավարությունները, ինչպես նաև առոգանության ուսումնասիրության ժամանակակից մոտեցումները՝ շեշտադրելով «ինչ է ասվում» և

«ինչպես է ասվում» գործոնների միասնությունը: Քննարկվում են արտահայտչական և վերաբերմունքային հնչերանգների տարբերությունները՝ ընդգծելով հնչերանգի փոփոխացնող դերը գործաբանական իմաստի ձևավորման մեջ, ինչպես նաև դրա հարաբերական անկախությունը բառաքերականական միջոցներից: Վերջում ներկայացվում են ուսումնասիրության նյութը, վերլուծության փուլերն ու մեթոդները՝ ներառյալ ընկալողական, լսողական և էլեկտրաակուստիկ վերլուծությունը:

Երրորդ գլխում քննարկվում են հասարակական-քաղաքական բազմախոսությունների շրջանակում կիրառվող կոնֆլիկտային և համագործակցային ռազմավարությունների ու մարտավարությունների առոգանական դրսևորումները: Հնչունական վերլուծության արդյունքում բացահայտվել են կոնֆլիկտային և համագործակցային բազմախոսություններում կիրառվող ռազմավարությունների և մարտավարությունների հնչերանգային առանձնահատկությունները՝ ընդգծելով միջուկային տոնի, սանդղակի և նախասանդղակի բնութագրերը, արտահայտչական շեշտերի դերը, խոսքի տեմպի և դադարների յուրահատկությունները, ռիթմի փոփոխությունները, ինչպես նաև ձայներանգի կիրառությունը՝ հաղորդակցական նպատակների իրականացման համատեքստում: Ուշագրավ է միջուկային տոների լսողական վերլուծության արդյունքում վեր հանած միջուկային տոների բազմազանությունը: Գնահատելի է այն, որ գործնական նյութի բազմակողմանի վերլուծությունը անցկացվել է մի շարք փուլերով՝ խոսույթային վերլուծության, գործաբանական, ընկալողական, լսողական, էլեկտրաակուստիկ և քանակական: Ատենախոսության համար առանձնակի կարևորություն ունի և այն հանգամանքը, որ ատենախոսը ռազմավարությունների և մարտավառությունների լսողական վերլուծության միջոցով ստացած արդյունքները համադրել է էլեկտրոակուստիկ արդյունքների հետ, ինչը հանգեցրել է վստահելի և ստուգելի արդյունքների: Հեղինակը անկասկած կատարել է իր առջև դրված խնդիրները՝ հիմնավոր կերպով ներկայացնելով թեմային առնչվող տեսագործական նյութը:

Եզրակացության մեջ, ինչպես հարկն է, ամփոփվում են ատենախոսության սահմանված խնդիրներից բխող վերլուծության ընդհանուր և մասնավոր արդյունքները:

Բարձր գնահատելով հետազոտության կարևորությունը՝ կանգ առնենք նաև որոշ դիտողությունների և հարցադրումների վրա.

- Ինչպե՞ս է հնչերանգը գործածվում որպես լրացուցիչ միջոց բազմախոսությունում՝ միջգործակցային իմաստների և նրբերանգների փոխանցման գործընթացում:
- Որքանո՞վ են հնչերանգային առանձնահատկությունները նշանակալի հաղորդակցական ուղղվածությունների ու մարտավարությունների արդյունավետ իրականացման գործում գործաբանական տեսանկյունից:
- Ինչպես են արտահայտվում մասնակիցների հուզական ներգրավվածությունը և նրանց վերաբերմունքը մյուսների նկատմամբ հնչերանգային և գործաբանական միջոցների միջոցով բազմախոսության ընթացքում:

Կատարված հետազոտությունը գրագետ, գիտական լեզվով շարադրված ավարտուն աշխատանք է, որի հիմնադրույթները պարունակում են գիտական նորույթ և հիմնավորված մոտեցումներ: Ատենախոսության հիմնական դրույթներն արտացոլվել են յոթ գիտական հոդվածներում: Ատենախոսության հիմնական դրույթները համապատասխանաբար արտացոլված են յոթ հրապարակումներում իսկ սեղմագրում ամփոփված են ատենախոսության ներկայացված վերլուծության արդյունքերը և եզրակացություններ: Սեղմագիրը համապատասխանում է ատենախոսության բովանդակությանը՝ ներառելով դրա հիմնական դրույթներն ու արդյունքները: Ատենախոսությունն ու սեղմագիրը շարադրված են մատչելի լեզվով, ձևավորումը համապատասխանում է ներկայացվող պահանջներին:


Ներկայացված ատենախոսությունը բովանդակալից, ամփոփ տեսական և գործնական հետազոտություն է՝ հանգամանալից վերլուծություններով: Այդ են վկայում նաև հեղինակի հրատարակած հոդվածները, հետազոտության եզրակացությունները, ոլորտին առնչվող օգտագործված գրականության հարուստ ցանկը:

Այսպիսով, Մանան Պայքարի Աղաբեկյանի *Բազմախոսության հնչյունական-գործաբանական առանձնահատկությունները (բրիտանական քաղաքական-հասարակական թոք-շոուների հիման վրա)* թեմայով ատենախոսությունն իր արդիականությամբ, գիտական մակարդակով, խնդիրների ընդգրկմամբ, ստացված արդյունքների հիմնավորվածությամբ և կիրառման հնարավորություններով

համապատասխանում է թեկնածուական ատենախոսություններին ներկայացվող պահանջներին: Ատենախոսության հեղինակ Մանան Պայքարի Աղաբեկյանը արժանի է Ժ.02.07 «Ռոմանագերմանական լեզուներ» մասնագիտությամբ բանասիրական գիտությունների թեկնածուի գիտական աստիճանի շնորհման:


Պաշտոնական ընդդիմախոս՝

Վ.Բրյուսովի անվան պետական համալսարանի
Անգլերենի հաղորդակցության ամբիոնի դեկան,
բ.գ.թ., դոցենտ



Սեդա Միխայիլի Գյուրջայանց

Հաստատում եմ Ս. Գյուրջայանցի ատենախոսության
ԲՊՀ-ի գիտքարտուղար՝



Ս. Փիլավջյան

19.03.2026